

illud imprimis, quod ab eis id me petere intelligo, qui præterquam quod plane sentiunt, non Florentinorum magis, quam sua interesse, vicinas tyranni opes, velut propinquum quoddam incendium, restinguere, ita libertatis, in qua & nata sit civitas & coaluit, studiosi credantur, ut nullus sit locus, in quo ejus speciem intueantur, quem non incolumem, & ab omni injuria (si fieri possit) defensum velint; oderintque uno ordine tyrannos, quippe quos inimicos, æmulos, invidos, hostes libertatis esse non ignorent. Possem ego rei hujus exempla multa referre, quam infestum Athenienses Philippum Macedonem habuissent, quam Romani Mithridatem, Antiochum, ac multos alios, qui dominandi libidine, aut certe alienæ libertatis invidia, invicti populi arma in se temere irritarunt. Sed quid nos vetera aut externa sequi oportet, quando domesticis abundemus exemplis? Nemo vestrum est, qui non viderit (ut credo) aut certe a parentibus quandoque non acceperit, quam acerbum Genuensi bello circa Clodiam, inde apud Taurisium Carrarius Princeps se huic civitati hostem exhibuisset. Quid Lodovicus Rex? quid alii multi, qui vestrum imperium sollicitare nunquam destiterunt? Nobis quoque cum Vicecomitum familia, quasi hæreditarium, jam inde a Luchini Principatu raro intermissum, bellum durat. Est certe, est hoc natura comparatum, ut qui suorum libertatem sustulerit, si alienam tollere non possit, vehementer odio habeat. Non possum ego non beatissimam appellare vestram Rempublicam, Veneti Patres, vosque etiam atque etiam felicissimos prædicare: quibus Carrarios, perpetuos Veneti nominis hostes, prius tollere contigit, quam hic leo violentissimus, cum quo nobis res est, adolevisset: qui si familiam illam Veneto nomini infestissimam, incolumem bis temporibus nactus esset. non in Bebianis stagnis, ut illi, sed terra, mari, fluminibus Venetos adortus, non imperium solum, sed libertatem etiam ipsam in summum discrimen adduxisset. Præclare itaque die illo vobiscum actum existimo, quo tam proximum incendium oppressistis: nisi nimia securitas ex illa victoria orta periculum, quod vobis ab hoc immanissimo tyranno imminet,